

Folgt weiters von der Architectura Navalis.

Es ist wol zu glauben/ das von dem so heroischen Wundergebaw der Arch Noæ, auch hernach die proportion iedoch von kleinerm corpora das Schiffgebaw geformirt/ vnd also in kleinere Ordnung seye gebracht worden. Von welcher

Arch Noæ, vnd nur sovil/ als erwann der schwache vnvollkommene Mensch / in seinen geringfügigen Gedancken fassen vnd ersinnen kan/ so hat mein Sohn/ Joseph Purttbach der Jünger seel. in seinem sibenden/ des 1661. Jahrs/ in den Truck gegebenen Tractat / Ferie Architectonica genant/ gar außführlich geschriben / vnd wie erwann die Arch Noæ vngesährlich geformirt möchte gewesen sein/ mit vier Knypfferblatten No: 1. 2. 3. 4. daselbsten klärlich vorgerissen/ darauff ich mich in allem referire/ der vngeszweiffelten Zuversicht/ es werde der Liebhaber diser dingen / nit allein Ergögligkeit/ sonder auch Nutzbarkeit darbey empfinden. Hierzu gegen aber der Arch Noæ, nur noch ein wenig zu gedencen/ vnd nach derselbigen Manier/ ein anders wol accommodirtes Schiffgebaw anzustellen/ so wolle der Architectus Navalis folgenden Bericht anhören.

Als im ersten Buch Mose am 6. Capitel der Allmächtige Gott/ die erste Welt / durch die Sündflutt verderben wöllen/ so hat er doch durch sein allerhöchste Weisheit/ zu vor dem Noæ anbefohlen/ ein Kasten von thännem Holz.

Mensur
vö der Arch
Noæ.

300. Elen lang - - -	}	neben einem Fenster einer Elen groß/ zu machen/ in welchem Kasten dann/ der großmächtige Gott / sein ihme noch vorbehaltene newe Welt/ hat salyren, vnd bey dem Leben erhalten wöllen. Dises so grossen ja über die massen heroischen Schiffgebaws/ vnd wie es doch eigentlichen darmit ein bewandnuß gehabt/ das hat ihme einiger Mensch hernach nie recht einbilden / vil weniger aber solches Götliche Werck völlig nachthun können. In bedencung/ das wann die besagte Elen / vnd iede derselben / nach iesziger Welt Mensur, für zween Werckschuch calculirt, oder gerechnet würden/ so müste folgen / das besagte
50. Elen in der weite/ vnd		
30. Elen hoch - - -		

ter Kasten

Wieviel
teutsche
Werck-
schuch

600. Werckschuch lang - - -	}	gewesen wäre/ darauff zu verspüren/ was für ein vngewöhnlich schweres Corpus in zusammen schliessung sovil 1000. Bawhölzer es erfordert hätte. Dannhero vnser nur Staub vnd Aschen sinnliche Vernunft / dise so hohe Ding nicht begreifen/ noch fassen kan/ das ein dergleichen groß / weit / auch so hohes / vnden ganz glattes Gebaw / (sintemahlen viel Leuth darvor halten/ das diser Baw / nicht auff die Architectonische Manier/ mit seinem vnden gewölbten/ oder halb runden Bauch / sonder nur / wie ein Kasten / mit glattem allein graden Boden / gleichsam wie ein Floß zubereitet gewesen) von dem Wasser könne erhöbt / empor getragen / vil weniger aber weiter fort geschwämmet werden. Rechnet man dann iede Elen oder Braza (nach Italianischer Sprach) die ich aber für ein Elenbogen verstehe/ an gemeiner Menschen größe Statur, bey dem Knöpflein des Elenbogens angesetzt / vnd bey dem andern Knöpflein des gleichs/ der Hand / neben der Puls herüber genommen/ so wird man die länge eines kurzen Werckschuchs/ welches 10 $\frac{1}{2}$. maist aber 11. Zoll / von einem Werckschuch betragt/ so auch nichts anders/ dann ein völliger Genoveser Palmo ist/ finden. Welches unsere VorEltern/ als ich mir gänglich einbilde/ für ein Elenbogen oder Braza werden gemaint / vnd verstanden haben. Man wird auch in gebrauchung diser Mensur, bey denen im alten Testament beschribenen Gebäwen/ Menschlicher Vernunft nach/ mit übel zu treffen/ wann dieselbige in ergreifung eines Palmo, für ein Elen calculirt wird/ die Gebaw alsdann in rechter proportion auffzurichten sein. Dannhero/ vnd nach solcher Mensur die Arch Noæ.
100. Werckschuch weit/ vnd - - -		
60. Werckschuch hoch - - -		

Oder aber
Palmi sie
lang/ weit/
vnd hoch
gewesen
seye.

300. Palmi lang - - -	}	gewesen wäre/ gleichwol aber/ so scheint es noch ein gar großes Schiffgebaw/ dergleichen weite vnd länge / auff dem Meer fahrend/ noch keines ist gesehen worden.
50. Palmi weit / vnd - - -		
30. Palmi hoch - - -		

Wiewolen es zwar gar vnnothig scheint / disen so hohen vnd allein dem Allmächtigen Gott wissenden schweren Sachen / weiters nachzufinnen / sintemahlen seine Allmacht vnd vnergründliche Weisheit/ hat alles wol gemacht/ nichts desto weniger aber so thut doch dises so hoch ansehnliche Werck die Arch Noæ, der Architectura Navali, sich in etwas vergleichen/ vnd vor arthen. Dannhero der zum theil so laborios noch vnverdroffene Mensch vmb das Schiffgebaw desto besser zu examinieren, Item die commoditeten in einem Schiff/ so wol für die Menschen/ als auch das Viehe / also zu subtilisieren/ das gleichwol/ vnd in begebender occasion es hernach zu Nutzen des Menschens/ etwas hiervon kan ge-